

Eqqumiitsuliornermik suliaqartut atugaannik qanoq ililluta oqilisaassisinnaanerput pillugu apeqquteqaat aallaavigalugu oqallinnissamik siunnersuut.

(Inatsisartunut ilaasorta, Peter Olsen, Inuit Ataqatigiit)

Akissuteqaat

(Ilinniartitaanermut, Kultureqarnermut, Ilageeqarnermut Nunanullu Allanut Naalackersuisoq)

Naalackersuisut Inatsisartunut ilaasorta, Peter Olsen, Inuit Ataqatigiit, qutsavigaat oqallisissiamik siunnersuuteqarneranut.

Naalackersuisut isumaqataapput, eqqumiitsulioriaatsini assigiinngitsuni tamani pitsaasunik eqqumiitsuliorpassuaqartugut. Qularutissaanngilaq, inuiaqatigiinnitsinnut ilusilersueqataasut pilersitsisartullu, tamatta ataatsimoorfigalugillu tulluusimaarutigisinnaasatsinnik. Taamaattumik ataavartumik oqallisigisarnissaat pitsaasuvoq periarfissanik eqqumiitsuliorut atugassarititaannik pitsanngorsaataasinnaasunik ujartuinermi.

Eqqumiitsuliornermik ingerlatsineq pillugu Inatsisartut inatsisaat nr. 11, 6. juni 2016-imeersoq aamma Kulturikkut ingerlatsineq sunngiffimmilu sammisasaqartitsineq pillugit Inatsisartut inatsisaat nr. 5, 6. juni 2016-imeersoq tunngavigalugit ukiut tamaasa aningaasanut inatsimmiit atugassat immikkoortinneqartarput. Taassuma saniatigut Aningaasanoorutit ilaannit iluanaarutinit agguaassisarneq pillugu Inatsisartut inatsisaat nr. 10, 22. november 2011-meersumit aningaasanik immikkoortitsisoqartarpoq. Inatsisit qulaani taaneqartut siulliit marluk nuna tamakkerlugu aningaasarsiutigalugulu eqqumiitsuliornermik ingerlataqartunut atugassiaapput, Inatsimmilu kingullermi taaneqartumi tamanut iluaqtissatut atugassanut atorneqartarlutik, soorlu kultureqarnermi suliniutinut.

Aningaasat taakkua nipilersortartunut, filmiliorartunut, atuakkiortunut allallu eqqumiitsuliornermik- kultureqarnermillu suliaqartut suliaminnut ingerlatsinerminnullu qinnuteqarnissaannut periarfissiisarput. Kultureqarnermi tapiissutinit assigiinngitsuniit tapersiutaasarput isumassarsianut ineriartortitsinernut, sulianut aallarnisaanernut kiisalu suliarinninnivinnut. Taakkunannga tapiissutiniit, allaniillu tapiissutaasuniit, eqqumiitsuliorut kultureqarnermillu suliallit suliaminnik ineriartortitsisarput.

Kultureqarnerup iluani ingerlaavartumik pitsanngorsaanerit ingerlanneqartarsimapput tapeeriaatsini assigiinngitsuni tapiissuteqarnerusalernikkut. Uani ilaallutik Nunatta Eqqumiitsulianik Saqqummersitsivissaanut tapiinerit, filmiliorartunut atugassarititat pitsanngorsarnerinut, uani ilaallutik filmiliorarfimmik pilersitsineq, kiisalu eqqumiitsuliorut timersornermi aaqquissuussani peqataanissaannut tapiissutit.

Atuakkiortut peqatigiiffiat, Kalaallit Atuakkiortut, saaffiginninnikuupput Naalackersuisunillu ataatsimeeqateqarsimallutik atuakkiortut atugassarititaat pillugit, tassani peqatigiiffiup

periarfissarsiuunneqarnissaq angorusullugu soorlu kalaallit atuakkiaasa nunani allani tuniniarneqarsinnaalernissaat eqqarsaatigalugu atuagaateqarnikkut allaffimmik pilersitsinikkut – taallugu Greenlit. Naalackersuisut 2018-imi suliaq pissanganartoq akuerisimavaat suliarlu tapersersimallugu aningaasanik 200.000 kr.-nik Tips-ernermit Lotto-nermillu aallarnissaatitut sammisassaqtitsinernullu tassunga attuumasunut.

Filmiliornerup iluani aamma annertuumik ineriartortoqarsimavoq, kalaallillu filmiliaat ataasiakkaat nunani allani ingerlalluarput. Filmiliortartut peqatigiiffiat FILM.gl-ip ilisimatitsissutigaa, nunanit allanit filmiliortartunit, Kalaallit Nunaanni filmiliornerissamut periarfissanik ujartuisunik, saaffigineqartarlutik. Nunanut allanut appakaannissamut periarfissaq Kalaallit Nunaannut pissanganartuuvoq.

Nunatta Atuagaateqarfia ineriartortitsilluni suliaqarnermi aamma eqqaaneqassaaq. Ukioq manna nittartakkamik ineriartortitsineq aallartissimavaat tamanut atugassamik pitsaaneruseqanngitsoq anguniagaqarnerminni. Ilaatigut internetikkut e-bog-inik atuakkanillu immiussanik eReolen aqutigalugu atorniartitsisalersimapput. Ukiumi nutaami aamma filminik atorniarsinnaanermik periarfissamik nittartakkaminni ineriartortitsiniarput. Tamanna suliaq aqutissiuussissaaq, atuakkiortut atuakkiaminnik aqutit nutaat atorlugit innuttaasunut siammarterisinnaalernissaannut pingaartumik attaveqatigiittarfitsigut inuusunneruseqanngitsoq eqquisumik. Naalackersuisut nuannaarutigiuannarpaat suliniaqatigiiffiit imaluunniit suliffeqarfiit periarfissanik pilersitsiniarnerminni sinaakutissanik ineriartortitsigaangata.

Naalackersuisut kultureqarnermik suliaqarneq ukkataraat. Taamaattumik ilanngullugu eqqaaneqassaaq, Naalackersuisut pilersaaruteqarmata eqqumiitsuliornermik-kultureqarnermillu ukiami 2020-mi isumasioqatigiissitsinissamik, ilaatigut eqqumiitsuliortut-kulturikkullu suliaqartut katersornissaannut siunissami politikkimik taakkununga attuumasumik ilusilersuinissaq anguniagaalluni. Politikkimut taamaattumut pingaaruteqarpoq immersorneqarnissaq, taamaattumik aamma Naalackersuisut soqutigaat Inatsisartunut ilaasortat eqqumiitsuliortutta soqutiginnittaasalu ineriartortinnissaannut siunnersuutaasa tusaanissaat.

Taamatut oqaaseqarlunga Naalackersuisuniit qilanaaraarput pissanganartumik oqallinnissaq.